

Amanan di cas dinamico di Noord:

GRUPO UNI TA CELEBRA SU DI TRES LUSTRO DI EXISTENCIA

ORANJESTAD (AAN): Dialuna 22 di Maart Grupo Uni a cumpli su di tres lustro (15 aña) cu a worde lanta. Diasabra 27 awo e miembronan lo bay celebra e fecha bunita aki.

Kico GRUPO UNI ta encera?. Den un entrevista cu Emiliana Tromp y Modesta Tromp, DIARIO a ricibi informacion tocante con e grupo ta funciona.

Actualmente e grupo ta forma 18 dama, nan tur ama di cas, cu ta reuni cada dos siman, Diaranzon mainta di 9'or di mainta pa 12'or di merdia, na Centro di Bario Noord.

Durante nan reunionnan nan ta conversa, planifica diferente actividad manera: comedia, baile, organiza fiesta pa fechanan special, etc.

Nan ta presenta na diferente caminda, como un contribucion gratuito sea na cas di anciano of ora tin algun casamento grandi nan ta presenta comedia, etc.

E grupo di damanan aki a representa Aruba na diferente

pais, entre nan, Curacao, Bonaire, Santo Domingo, Venezuela, y Costa Rica. Den plan pa futuro nan plan ta pa bay keiro den crucero rond Caribe, y nan intencion ta pa duna un show riba vapor pa entretene e turistanan.

Recientemente nan a haya invitacion pa bay Bon Bini Festival, y si esaki ta bira realidad lo ta pa prome biaha nan lo bay presenta den e importante actividad aki.

UN TIKI STORIA: Di-escinco aña pasa GRUPO UNI a cuminza ora cu Glenda Giel, trahador social, a trece e idea dilanti pa lanta un grupo di ama di cas cu no ta sali for di cas, pa nan haya un tiki distraccion. Glenda te awo, a keda consejera di e grupo. Den e tempo ey tabata tin apenas cinco damas y cada un mester a busca tres ama di cas mas pa bini hunto. E prome biaha cu nan a bini hunto tabata basta hende, pero despues a keda cu un total di 25 persona. E grupo a cuminza bao number di "Coffie Morgen", pero despues nan a ri-

para cu e lazo a bira hopi mas fuerte y a cambia pa "Grupo Uni".

E grupo ta mantene nan necesidadnan cu un contribucion di 3 Florin mensual pa miembro. Door di actividadnan manera desayuno, dia familiar, bingo, rifa, e.o, nan ta haya entrada pa ora nan kier bay afo. Ora nan ta haci show nan ta cobra entrada.

EXPERENCIA: Durante e 15 añanan aki e experiencia ta hopi positivo, nan tin amistad cera, y a pesar di cualquier coi chiquito motiva pa diferencia di caracter, nan semper ta sigui uni, y cu voluntad pa yuda otro y comparti cu otro, specialmente sentimentonan mutuo.

E grupo a yega di duna ayudo na un miembro cu a pasa den un situacion hopi penoso. Pa diferente motibo e grupo a bira awo cu 18 persona.

SIMBOLONAN: Grupo Uni tin nan propio Himno y nan Bandera. Esaki a bini door di e lazo cu nan tin y ora nan ta reuni nan ta canta



Himno Nacional di Aruba y nan himno. Awo nan ta bay renoba e bandera cual ainda no ta cla.

APOYO: Grupo Uni ta conta cu hopi apoyo di nan respectivo famia, yiu y esposonan. Den e "Family Day" nan tur ta participa hunto. Tin planea pa den vacancy grandi bay cu nan nietonan na un rond trip, ya cu mayoria yiu di e damanan ta grandi caba y casa.

BISHITA: Grupo Uni ta haya bishita di gruponan di dama similar, cu tin na Bonaire y Curacao. Casi tur aña algun grupo ta bini, y e grupo ta prepara un encuentro den Centro di Bario, pasa rond trip na diferente lugar na Aruba. Nan ta bin celebra nan fecha na Aruba y Grupo Uni ta prepara tur cos pa nan, busca estadia, prepara bus pa transporte, etc.

Esey kieren cu nan ta cera hopi amistad pafo di Aruba tambe.

CELEBRACION: Dia 27

nan ta bay celebra e di tres lustro cu un Santo Sacrificio di Misa na Misa Santa Ana, pa 7'or di anochi, sigui pa un recepcion di 9 pa 11'or di anochi pa invitadonan na Centro di Bario Noord. Nan ta bay presenta un show di baile folclorico y un brindis.

GRADICIMENTO: Grupo Uni kier ta gradici tur esnan cu a coopera cu nan, como patrosinador den diferente ocasion, y tambe nan kier gradici tur nan miembro y ta spera pa nan continua semper hunto. Nan deseo ta pa sigui yuda nan bario di Noord y ademas pa stimula otro amanan di cas na otro barionan pa nan tambe lanta un grupo asina, ya cu esaki ta masha positivo mes, como recreacion, pa haya un caminda di sali haya recreacion pa alivia un tiki e tension di e trabaonan di cas. Tambe pa cera amistad y por organiza actividadnan na Aruba y den exterior.